

Udang Kara yang ditenak oleh Muhammad Hazizi di rumahnya Port Dickson, Negeri Sembilan.

Muhammad Hazizi memulakan ternakan anak benih udang kara di rumahnya dengan modal RM10,000 bersama tiga rakannya.

Ternak 'sepit merah' tepi rumah

Pembantu farmasi mahu bina hab pengeluaran anak benih udang kara di Port Dickson

Siapa sangka dengan memanfaatkan kawasan di sebelah rumahnya untuk memternak kira-kira 40 ekor anak benih udang kara atau *lobster*, kini ternakan milik Muhammad Hazizi Ghazali itu bakal menjadi hab ternakan anak benih udang kara air tawar di Port Dickson, Negeri Sembilan.

Pembantu farmasi berusia 25 tahun itu berkata, beliau mula memternak udang kara di dalam dua tangki air di sebelah rumahnya tanpa sebarang ilmu pada 2018 dan belajar sendiri selama enam bulan bagaimana proses untuk memternak, mendapatkan kadar pH air yang sesuai sehinggalah udang kara berjaya bertelur dan menghasilkan anak benih.

"Daripada 40 ekor anak benih itu, lebih separuh daripadanya mati. Selesai fasa eksperimen pada bulan Oktober saya buat keputusan untuk jalankan perniagaan anak benih udang kara bersama tiga lagi kawan yang juga bekas pelajar Diploma Farmasi dengan bermodalkan RM10,000.

"Kami bina tempat ternakan anak benih dalam akuarium, kolam simen dan kolamanvas bersebelahan rumah saya," katanya.

Muhammad Hazizi berkata, permintaan tinggi terhadap anak benih udang kara jenis *red claw* itu sehingga terdapat tempahan yang masih tertunggak, mendorongnya untuk melangkah setangga lagi dalam perniagaannya itu.

"Kalau saya siarkan dalam Facebook memang banyak tempahan masuk. Tempat ternakan yang ada sekarang hanya boleh memuatkan kira-kira 2,000 hingga 3,000 anak benih bersaiz satu ke tiga inci dan setiap satu inci tumbesaran mengambil masa sebulan," katanya.

Usaha penuh permintaan pelanggan

Justeru, bagi memenuhi permintaan tinggi termasuk pelanggan dari Pahang dan Melaka, beliau merancang untuk membina hab ternakan anak benih udang kara di atas tanah bersebelahan rumahnya yang akan diusahakan bersama Persatuan Nelayan Kawasan Port Dickson (PNKPD), sekali gus dapat meningkatkan lagi pendapatannya.

Udang kara juga boleh makan kawannya sendiri khususnya ketika proses bersalin kulit. Jadi, memang kena pantau betul-betul, kalau tidak lebih banyak yang akan mati."

- Muhammad Hazizi

"Hab ternakan anak benih ini nanti mampu mengeluarkan 10,000 anak benih bersaiz satu hingga tiga inci dan 6,000 hingga 8,000 ekor udang kara dewasa dalam tempoh sebulan dengan kos pembinaan dianggarkan RM100,000," katanya.

Muhammad Hazizi berkata, seekor udang kara bersaiz tiga inci boleh menghasilkan 150 ke 200 ekor anak benih tetapi hanya 80 peratus yang akan hidup bergantung kepada penjagaan termasuk pemakanan dan pH air.

"Selain daripada perlu pastikan air tidak terlalu kotor, pH yang sesuai, diet dan pemakanan terjaga, antara cabaran memternak udang ini adalah ia terdedah kepada haiwan di sekeliling seperti burung raja udang, biawak, katak dan memerang kerana ternakan ini berkonsep terbuka.

"Udang kara juga boleh makan kawannya sendiri khususnya ketika proses bersalin kulit. Jadi, memang kena pantau betul-betul, kalau tidak lebih banyak yang akan mati," katanya.

Ternak benih secara komersial

Mengenai harga jualan anak benih udang kara, beliau berkata, ia bergantung kepada saiz bermula RM1 hingga RM5 seekor dan biasanya pelanggan akan membeli 300 hingga 600 ekor anak benih.

"Kita juga buat bayar ketika terima (COD) tetapi tempahan minimum adalah 200 hingga 300 anak benih dan ada caj penghantaran.

"Untuk mereka yang baru berjinak-jinak dalam ternakan udang kara ini saya sarankan ambil pakej iaitu set tempat ternakan kolam

kanvas dengan anak benih bersama lima ekor induk," katanya.

Muhammad Hazizi berkata, buat masa ini, beliau turut bekerjasama dengan empat lagi rakannya dikenali sebagai *PD Lobster Group* untuk memternak anak benih udang kara sehingga dewasa untuk dipasarkan ke restoran.


"Kita rancang untuk mula bulan April ini, kumpulan ini akan ternak anak benih secara komersial di lokasi masing-masing dan anak benihnya saya bekalkan.

"Apabila dewasa nanti anak benih diserahkan semula kepada saya untuk dipasarkan ke restoran di sekitar Port Dickson," katanya.

Selain itu, Muhammad Hazizi berkata, beliau juga merancang untuk membuat tempat ternakan baharu jenis kolam tanah di Pasir Panjang, Port Dickson hujung tahun ini.

Katanya, kolam tersebut disasarkan untuk mengeluarkan udang kara dewasa seberat 50 hingga 100 kilogram sebulan.

"Ketika ini saya dalam proses untuk dapatkan sijil Skim Amalan Pertanian Baik Malaysia (myGAP) kerana dengan adanya pengiktirafan ini ia menunjukkan tempat ternakan kolam tanah ini bersih dan terjamin, sekali gus dapat memastikan pasaran hasil ternakan diperluas dalam skala lebih besar," katanya. - *Bernama*



UDANG KARA AIR TAWAR

- Juga dikenali *red claw crayfish*
- Dipercayai berasal dari Australia
- Mudah ditenak, kurang dijangkiti penyakit
- Saiz matangnya antara 8 hingga 14cm
- Harganya kira-kira RM60 per kilogram
- Kaya dengan protein, kurang kolestrol
- Boleh dijadikan haiwan hiasan akuarium